

**Sapaatip akunneranik pujortarnaveersaarfimmik pilersitsinissaq anguniaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut**

(Inatsisartunut ilaasortaq Hans Enoksen, Siumut)

**Akissuteqaat**

(Peqqissutsimut Naalakkersuisoq, Agathe Fontain)

**Aappassaaneerneqarnera**

Ilaqutariinnermut Peqqissutsimullu Ataatsimiititaliap siunnersuummik matuminnga suliaqarnera Naalakkersuisut qujassutigaa.

Pujortartarneq pillugu pinaveersaartitsinerup aallunneqarnissaata ukiut tamaasa ingerlanneqartarnissaa qulakkeerneqassasoq aalajangiiffigisassatut siunnersuummi siunertarineqarpoq. Siunertarineqartoq tamanna ullumikkut atuuttunut siunissamilu pinaveersaartitsinermi suliniutinut tulluarpog.

Ataatsimiititaliap sularinninnermini tupanut akitsuutit annertussusaat pujortartartullu amerlassusaat ataqatigiinneri pillugit nassuiaat Ilaqutariinnermut Peqqissutsimullu Ataatsimiititaliamit apeqqutigineqarpoq.

Nunani tamalaani misissuinerit takutippaat tupat akiinik qaffaarujussuuartarneq tupatornerup annikillineranik kinguneqartartoq. Akinik qaffaasarneq akitsuutinillu qaffaasarneq inuit pujortarunnaarsinniarninut imaluunniit pujortartalernissaagaluumut pinaveersaarutit sakkussatut sunnuteqarnerpaatut isumaqarfigineqarpoq. Sunniuttigisartagaa pingaartumik inuusuttut pujortartalerlaallu akornanni takuneqarsinnaavoq.

Tamatuma saniatigut tupanut akitsuutinit Nunatta Karsiata iluanaarutigisartagaasa ilaannit pujortartarnerup pinaveersaartinneqarnissaanut atorneqartarnissaat Ilaqutariinnermut Peqqissutimullu Ataatsimiititaliap oqaluuseraa. Taamaattoq Naalakkersuisut isumaqarput akileraarutit akitsuutillu aalajangersimasunut atugassanngortinnissaat politikkerit pisariaqartunik pingaarnersuinissaannut paaaffiginninnerussasoq. Iluanaarutip annertussusaa aalajangiisunngorsinnaammat suliniutip aallartinneqarnissaanut, politikikkut inuiaqatigiinnilu killilimmilluunniit kissaatigisaqarnerminngarnit. Taamaattumik akileraarutit akitsuutillu isertitat allat assigalugit Nunatta Karsianut isertinneqartariaqarput, tamatumalu kingunerisaanik ukiuni aggersuni isertitat aningaasartuutillu Inatsisartunit Naalakkersuisunillu pingaarnersiorneqartarlutik.

Tamanna tunngavigalugu ukiumoortumik spaatip akunnera 22 atuutilersinneqarnissaa pillugu aalajangiiffigisassatut siunnersuut akuersissutigineqassasoq Naalakkersuisut innersuussutigaa.